

TAMPANANA ATI IKI

swara liri ngedipis atis
 ing sasela-selaning ati sasi agustus
 kaya kanḍa tanpa sabawa apa
 sasi agustus sasi kang mulus
 sasi kebak pangarep-arep ngaléla

nimas,
 tampanana ati iki
 généya dadak suwala
 atimu lan atiku pinḍa sadulur kembar
 manunggal ing rupa lan panyandra
 langit biru kuwi
 duwèkmu lan duwèkku

yèn sliramu lagi sungkawa
 coba sawangen lan arasen
 osiking ati kang kebak ing pangarep-arep
 kaya apa kang dumeling ing talinganmu

tampanana ati iki
 sasi agustus sasi kang mulus
 sasi siji ati siji
 tampanana ati iki

nimas,
 ing sasi kang wis dadi nyawiji iki
 aku ora bisa asung punika-puniki
 kajaba mung pangajab muga
 tampanana ati iki

tampanana
 jalaran tresnaku
 tresnané jiwa kang nunggal angga

Y. A. Damayanti
 (in: Dharma Kanḍa no. 302, August 1975).